

Been Im Ju Pa Koe Ka daux

Phuk Lai Sigang Khri



Baux (4)

Khrawm Kaīng Lai

Simin Kaīng Lai Plah Lai

1.	Davit Mai Gumlox Sijax Mukheu Siyiex	1
2.	Meung Pa Kuang Davit	11
3.	Cao Jhai Khankix	23
4.	Pa Grheu Hu Tang Meung Mai Pa Deeh Hoek	35
5.	Siyiex Tawx Sijax Mukheu Grawng Sang Ploi Misiyax	45	

Title: The living story from the Bible

Translated to the Wa language by:

Yex Ka Lin

Ai Sang Awng

Sam Lao Pao

I Rong Khun

Ai Kap Sin

Sai Rong Khun

Edition: First Draft

Date: 29. 7. 2016

Kheu lai riieng pa plak plih pakpeung gumlox Siyiex in kieh aik o
paox grawm mai ceu cao pa koe ka piang haktiex khawm uik
mawh buanson, riang rao ka daux

Yesux Khrit liak.

Translated from the English *Open Bible Stories*. Original work available at unfoldingWord.org/stories

This work is licensed under the Creative Commons Attribution-NonCommercial-ShareAlike 4.0 International License. To view a copy of this license, visit <http://creativecommons.org/licenses/by-nc-sa/4.0/> or send a letter to Creative Commons, PO Box 1866, Mountain View, CA 94042, USA.

Davit Mai Gumlox

Sijax Mukheu Siyiex



1Samoelax Phuk 10:15–19, 24, 31, 2Samoelax 5, 7:11–12



Sawlux mawh simiang pa liang son pui ceu Isarilax heue.


Nawh mawh pui pa grum naog mai grang pakpeung pa simie pui Isarilax ti cie heue. Nawh mawh pui lhaong mai koe grang heue. Viang mawh nan nawh ang cu nghiiet ka lox Siyiex. Mawh kheu nan Siyiex tom deeh laug pui tix kaux son sang plud dah dee ot nawh heue.



Ceu kaux nawh mawh Davit, pa mawh cao pa liang yung heue. Yam liang nawh yung, nawh pon pah ka krih mai sivai sangsi pa sawg ti ih ka yung pa liang nawh heue. Davit mawh pui pa awn rhawm, pa rah see, pa deuh rhawm tix ka Siyiex mai pa cu nghiiet ka lox Siyiex heue.




Davit mawh pui naing pa mhawm mai cao kaing pa mhawm tix kaux heue. Tom yam iak nawh, nawh sax ngah ka pui ting riang pa kaux Gawliax heue. Gawliax mawh pui vao ka naing mai pui ting riang tix kaux heue. Krax lhaong nawh dex koe 3 mita (6 sawk mai 1 diex) heue. Davit pex pah Ka Gawliax an mai taoh ka pui Isarilax heue.



Sawlux boh rhawm ka Davit mai jawm ti pah nawh ku jheeng heue. Nawh sawg ka Davit son sang pon ti pah nawh heue. Sawlux laig daux rang pa mox Davit tix heue. Davit ang pah Sawlux, nawh briex pat toh sibex Sawlux yam laig it Sawlux mai jhi sakse grawng pa ang nawh doh pah ka Sawlux son sang mawh tix simiang heue.




Deeh ghoik Sawlux yum daux naing mai Davit mawh simiang pui Isarilax heue. Davit mawh simiang mhawm tix kaux mai pui meung khankix moh ka nighth. Siyiex nawb buan piang nighth mai kieh nighth koe krax pa pex pon heue. Davit kied pon yuh naing tom nie bawg mai Siyiex tawx krax pex pon tom nie ka nighth heue. Davit pex pon ka veng Yerusalem mai kieh mawh meung tix heue. Baux yam kuang Davit, meung Isarilax ting riang mai kied mi heue.




Simiang Davit simie ti yuh nyiex buan son sang pon pui khawm uik ti krub Siyiex mai tan ka Siyiex heue. Pui Isarilax krub Siyiex mai tan ka Siyiex, ka daux nyiex gox buan man pa yuh Mose tom hoik rheung dex 400 num heue.




Siyiex ploi cao jhai Natan hoek ka Davit mai krai lox yuh nin, “Davit maix mawh pui yuh naing, ang chix ti yuh nyiex Aux. Aux tag kieh kawn maix yuh. Siyiex sang nawb buan ka maix. Daoh doe simie maix tag sang pon ti ngawm piang dang ngeung pui Isarilax ku jheeng heue. Misiyax tag sang mawh doeh ceu cat maix tix kaux heue. Misiyax ah ex mawh pui pa laug Siyiex tix kaux son sang taoh kawn pui khaing phimap heue.”




Khaix hoik mhong lox an, Davit yaogyaw buanson Siyiex dom mawx dom an heue. Mawh kheu jao Siyiex tawx lox mukheu son sang nawb buanson ka nawh tom nie heue. Pui Isarilax yaox ti pau Misiyax been tix rheng num heue.



Simiang Davit kuang meung daux krax pa rah see tom nie num heue. Viang mawh nan ka sang uik bawg yam baux ju nawk, nawk phit vao sivoe ngai Siyiex heue.




Tix ngaix, yam hu pui naing khankix puing naing, yam kaoh Davit khaing dee it tix plak pon ngaix nawk yaox bun mhawm grang tix kaux heem tix heue. Ceu kaux nawk mawh Batashebax.




Davit nhie siliex tix kok Batashebax hoek ka tix heue. Simiang Davit ot mai bun an mai kieh nawh deeh ing ka nyiex khaix heue. Ang rheung Batashebax tawx lox hoek ka Davit mai krai grawng koe kaux tix heue.



Uriyax pa mawh mex Batashebax mawh lien pa sidaing mhawm son Davit heue. Davit kok Uriyax khaing dah dee puing naing son sang ot nawh mai moeng nawh heue. Viang mawh nan Uriyax ang ing ka moeng tix mai hu it mai cub paox lien tix heue. Mawh kheu nan Davit tom ploi nawh hu dah dee kin puing pui naing son sang kieh nawh yum daux naing heue.



Yam hoik yum Uriyax daux naing, Davit teei Batashebax mawh moeng tix heue. Khaix an koe kawn simex tix kaux heue. Siyiex ang khaw rhawm ka krax pa yuh Davit. Mawh kheu nan Siyiex ploi cao jhai Natan hu ka Davit son sang kieh nawh tawng ka phimap yuh tix heue. Mawh kheu doh keud Davit ka phimap pa yuh tix, Siyiex pluat ploi ka phimap pa yuh nawh heue. Jah yam an, Davit sipub ceu pa nu pa khawm ceu pa tix ang ah, nawh deuh rhawm tix ka Siyiex ngie khaing heue.



Viang mawh nan kheu phimap pa yuh Davit kawn simex nawh yaox ti yum tang heue. Khaix an siawp sibrawm Davit dieh hu sipie mai sivix khankix kawx lih ti koe ka daux nyiex ma nawh heue. Viang Davit ang kaux sijax ka Siyiex kawx Siyiex kieh sijax mukheu Tix kaux cong ka piang nawh heue. Batashebax baoh keh kawn simex tix kaux pa mawh Sawlamon heue.

K. Deeh Theng Ka Been

1. Kheu Siyandex ang khaw rhawm ka Sawlux, Siyandex laug ka pui mawx? Nawn mawh pui pa yuh ka mawx?
2. Viang Sawlux koeng ka Davit miex ding kawx, Davit deeh pawk bix yuh ka mawx?
3. Siyandex nawb buan ka simiang Davit yuh ka mawx?
4. Viang Davit simie ti sum nyandex buan kawx, Siyandex kieh cao jhai Natan krai pa tix ka nawn?
5. Davit yuh pa lud pa yuh ka mawx?
6. Khaix hoik tawng Davit krax pa lud tix, nawn yuh pa tix? Nawn een rhawm ka Siyandex ka daux pa yuh ka mawx?
7. Kheu jao phimap pa yuh Davit, nawn yaox krax pa yuh ka mawx?

Kh. Krax Pa Doh Rhawm Ka Been

1. Ka daux been in maix yaox Siyandex sitoe tix mai kawn pui yuh ka mawx?
2. Kheu pa tix Siyandex laug Davit mawh simiang son pui Isarilax?
3. Dee bleeh Misiyax mawh pa tix? Nawn mawh pui mawx?

G. Krax Pa Deeh Shiao Daux Ju Tix Khaing Been

1. Viang Sawlux sang pah ka Davit kawx, nawn deeh pawk bix ka daux krax pa mhawm. Ka daux krax im ju ex, ex caw tix pawk bix ka daux pa yuh ka mawx ka pui pa koeng ka ex?
2. Son sang pon krax pluat ploi phimap, ex caw tix yuh pa tix?

Ng. Ceu Pa Rieb Gau Ex Khaing Been In

1. Siyiex ang jhak grang pakpeung kawn pui. Jhak ka rhawm rhi pa koe ex ngie.
2. Phan ex doh keud ka phimap pa yuh tix mai khiox khaw ka Siyiex, Siyiex tag sang pluat ploi ka phimap ex heue.

P. Baux Lai Pa Caw Tix Ci

1Samoelax 16:7 (kh)


*Mawh kheu pa yaox Siyiex ang awm pa yaox kawn pui,
kawn pui jhak ka grang pakpeung ka praix. Viang mawh nan Siyiex
jhak ka daux rhawm rhi.*

Meung Pa Kuang Davit



Lai Simiang Phuk Tix 1–6, 11–12

Khaix hoik yum Davit, kawn simex nawh Sawlamon deeh mawh simiang heue. Siyiex sikah mai Sawlamon ah nin, “Mawh sang simie maix Aux tawx ceu pa tix ka maix lie?” Yam an Sawlamon rawg mhaing ka pingnya cuyi heue. Siyiex kied sidaing khaw rhawm kah mai kieh Sawlamon mawh pui pa ting pingnya cuyi ka piang bee haktiex heue. Lheu khaing an kieh nawh koe sin ngao tom nie heue.




Sawlamon sum nyiex buan daux veng Yerusalem heue. Son sang pon sum nyiex buan an cao pa kraix khrawm kraung mawh keeing nawh Davit heue. Pui khawm uik ang lai rawg buan daux nyiex gox buan man, kix dux dah dee rawg buan mai yuh krax tan daux nyiex buan heue. Siyiex lih hoek daux nyiex buan an mai ot tan heue. Siyiex ot koe tau mai pui Nawh tan heue.




Sawlamon moh ka bun pui tang ceu tang cat heue. Naws ang cu nghiiet ka lox Siyiex mai teei moeng tix rheng kaux heue. Bun an kix mawh bun khaing tang meung mai kix viex siyiex pa krub tix hoek mai tix heue. Yam hoik riex ju Sawlamon, naws kawx hawt ti krub ka siyiex an kix heue.




Mawh kheu nan Siyiex song rhawm ka Sawlamon mai kieh meung naws goih ti lih mawh ra plak heue.




Khaix hoik yum Sawlamon, kawn simex nawh Rehobom deeh mawh simiang heue. Rehobom mawh pui hai tix kaux. Pui Isarilax khrawm paox tix hoek ka Rehobom mai yaog nawh mawh simiang tix heue. Pui Isarilax khankix krai lao ka Rehobom grawng kieh Sawlamon kix yuh kaing tom taug mao mai koh keun tom nie ka kix heue.




Khaix hoik mhong lox ceu an Rehobom deeh pawk lox pa caox yuh nin, “Aux tag sang kieh pex lheu taug mao khaing baux keeing aux Sawlamon. Mai aux tag sang nie tang phimap piang pex lheu khaing baux ju keeing aux Sawlamon?”



Pui Isarilax (10) ceu tieh feen ka Rehobom heue. Mawh pui pa kawn deuk (2) ceu ngie khaing pa ot ka greem pa kuang nawh heue. Meung pa ot pui (2) ceu an kix kok mawh meung Yudax heue.




Can pui Isarilax (10) ceu pa tieh feen ka Rehobom tom yaog Yerobom mawh simiang kix heue. Kix kok meung ot tix mawh meung Isarilax heue.



Yerobom yuh kaing pa tieh feen ka Siyiex mai kieh pui tix khawm uik lud hu daux krax phimap heue. Nawh ang kieh pui khankix rawg buan krub ka Siyiex daux nyiex buan pa koe daux meung Yudax. Nawh yuh riieng rao ra mu mai kieh kix krub kah heue.



Meung Yudax mai meung Isarilax lih ti mawh pui koeng ka paox tix mai yuh naing ku jheeng ka paox tix heue.



Simiang pa kuang ka meung Isarilax mawh simiang pa caox
Ku kaux heue. Simiang an kix plak nie yaox ti yum kheu pa pah
pui Isarilax tang kaux, pa simie ti yuh simiang khankix heue.



Pui ceu Isarilax mai simiang Isarilax khankix krub ka riieng rao
ngie heue. Mawh kheu nan krax lud loe mex moeng mai krax pa tan
kawn praix khankix lih ti koe daux nyiex ma kix heue.



Simiang meung Yudax mawh doeh simiang Davit heue. Simiang tiblah mhawm kuang meung daux krax pa rah see heue. Kix krub ka Siyiex pa mawh pa meh heue. Viang mawh nan simiang Yudax plak nie mawh pui caox, ang mhawm been mai krub ka riieng rao heue. Simiang tiblah tan kawn praix tix ka riieng rao heue. Pui meung khankix kawx tieh feen ka Siyiex mai krub ka rieng rao heue.

K. Deeh Thawk Theng Ka Been

1. Sawlamon mhaing pa tix ka Siyiex, Siyiex tawx nawh mawh pui pa yuh pui ka mawx?
2. Kheu pa tix Siyiex song rhawm ka Sawlamon?
3. Rehobom mawh simiang pa yuh ka mawx?
4. Khaix hoik goih meung Isarilax mai meung Yudax ra plak, krax ot krax koe kix koe yuh ka mawx?
5. Jhawm pui Isarilax khankix koe yuh ka mawx?
6. Jhawm pui Yudax khankix koe yuh ka mawx?

Kh. Krax Pa Doh Rhawm Ka Been

1. Maix yaox Siyiex yuh ka mawx daux been in?
2. Krax pa ting jhawm lhaong rhawm, chix kieh ex yuh ka mawx?

G. Krax Pa Deeh Shiao Daux Ju Tix Khaing Been

1. Awm mhaing simiang Sawlamon pingnya cuyi ka Siyiex, maix kawx sang mhaing ceu pa tix ka Siyiex?
2. Viang simiang Sawlamon mawh pui lhaong pingnya cuyi kawx, nawh ang pon via ka ceu pa nyaw pa glaw. Ex kawx caw yuh satix ka ceu pa yuh ka mawx ka daux krax im ju ex?
3. Son sang ang rhawm rhi ex tang siyox, ex caw tix koe rhawm rhi pa yuh ka mawx?

Ng. Ceu Pa Rieb Gau Ex Khaing Been In


1. Siyiex mawh num riah piangnya cuyi heue.
2. Alo nex nham chix kieh ex hoek krax laux leeing.
3. Krax pa ting jhawm lhaong rhawm chix kieh rhawm rhi ex tang siyox mai tawx krax pa sivix ka daux cub caw heue.

P. Baux Lai Pa Caw Tix Ci


Lai Lox Kap 1:7 (k)

*Rhawm pa lhat pa graung ka Siyiex mawh num riah
pingnya heue.*


Cao Jhai Khankix




Lai Simiang Phuk Tix 16–18, Lai Simiang Phuk Ra 5, Lai Yeramix 38




Ka daux puag pua pui ceu Isarilax, Siyiex ploi cao jhai hoek son kix heue. Cao jhai an kix mawh pui pa krai lao grawng pa simie Siyiex ti tawx ka kawn pui khankix heue.




Bawg yam kuang simiang Ahap meung Isarilax, koe cao jhai tix kaux pa mawh Eliyax heue. Ahap mawh simiang pa caox, pa kieh pui meung khawm uik krub ka siyiex Balax heue. Cao jhai Eliyax ah nin ka Ahap, “Phan aux ang krai ka lhiex mai rawm ciex lih hoek, ceu an kix ang doh lih hoek daux meung Isarilax heue.




Khaix an Siyiex nhie Eliyax mox ti daux tiag dex rawm klawng kheu sawg simiang Ahap ti pah ka nighthue. Sim khankix viex khaomun mai kax hoek ka Eliyax ku singaix heue. Ahap mai kru naing lien nighthawg ka Eliyax heue. Viang mawh nan kix ang yaox nighthawg heue. Mawh kheu kied kin kroh haktiex, pie rawm klawng kawx hoik hit kah heue.




Mawh kheu nan Eliyax hu daux meung tang dah heue. Daux meung an koe miex mai tix kaux, nighthawg koe kawn simiex tix kaux heue. Bawg yam an mawh kheu hoek bawg yam sibhawm praix, priex ih dex sang uik kah heue. Viang mawh nan miex mai kawn simex nighthawg priex ka Eliyax mhawm mhawm heue. Mawh kheu nan Siyiex tom naok priex ih kix ku jheeng heue. Viang sibhawm praix kawx kix yaox ti ih ceu pa ih mhawm mhawm heue. Eliyax kawx ot mai kiex tom rheung heue.




Khaix hoik rheung loe num, Mawh kheu Siyiex sang deeh kieh Ihiex lih daux meung Isarilax, Nawh tom kieh Eliyax deeh ing meung Isarilax son sang sikah mai simiang Ahap heue. Yam yaox Ahap ka Eliyax nawh ah huh nin, “Pui tawx krax tuktiak hoek heue.” Yam an Eliyax ah nin, “Mawh ngie maix pa tawx krax tuktiak heue. Maix hoik tik ka Siyiex pa mawh pa meh mai krub ka siyiex Balax heue. Hu kraix khrawm pui Isarilax hoek piang gawng Khamelax.”



Cao jhai Balax (450) kaux mai pui Isarilax khawm uik hoek ka gawng Khamelax heue. Eliyax ah nin, “Pex sang tieh loh tix yam mawx? Phan Siyiex mawh Siyiex, maix hawt khaix Nawh Cao mai phan Balax mawh siyiex, maix hawt khaix nawh heue.”



Khaix an Eliyax nhie cao jhai Balax pah moi son sang tan piang khu tan. Viang mawh nan paw vi sau ngu. Aux kawx sang yuh awm an heue. Siyiex pa pawk lox mai tawx ngu lih tag mawh Siyiex tete heue. Cao jhai Balax khankix khre riien khu tan mai ang sau ngu heue.



Khaix an cao jhai Balax tom kok yo lox ah nin, “Oh siyiex Balax eue, pawk ka lox kok yo yix liak. Tiblah pat tokaux tix ka vaig mai kok yo ka Balax heue. Viang mawh nan Balax ang pawk ka lox kix heue.”




Khaix hoik luan bawg yam leng lang singaix, Eliyax khre riien son khu tan tix heue. Khaix an Eliyax kieh pui lhauk rawm ka pung ting 12 pung piang nex, khix pa koe ka piang khu dee tan mai hawt rawb rim khu dee tan khawm uik heue.




Khaix an Eliyax kok yo ah nin, “Siyiex Abraham, Icak, mai Isarilax eue, jhi yix tawng grawng mawh Maix Siyiex pui ceu Isarilax mai mawh aux siliex Maix liak. Son sang pui ot tin khawm uik tawng Maix mawh Siyiex, pawk ka lox kok yo aux liak.”




Khaix an ti vud ngu lih khaing raoma mai lih gleeing nex, khix, simaox mai tiex rawb rim khu dee tan heue. Yam an pui khawm uik gup ngai mai ah nin, “Simiang Siyiex mawh Siyiex tete. Simiang Siyiex mawh Siyiex tete heue.”




Khaix an Eliyax ang cu kix kieh cao jhai Balax boek tix kaux kawx mai giex ka kix heue. Eliyax kok ka kix mai pah kix yum heue.




Khaix an Eliyax ah nin ka Ahap, “Lhiex dex sang lih, nied ti ing daux veng phai phai.” Ang rheung raoma vhaik mai lhiex ting lih hoek heue. Siyiex kieh bawg yam kroh praix klawng uik mai jhi grawng mawh Tix Siyiex tix kaux ngie khaing heue.



Khaix cao jhai Eliyax, Siyiex laug Elishie mawh cao jhai heue. Siyiex yuh mhai pa daox deng kheu Elishie tom nie heue. Ka daux an kix grawng cao kaing kru naing Romax tix kaux, pa mawh Neman, pa caw jhawm saux sipawg kawx viex ka daux heue. Yam mhong Neman grawng Elishie khaing siliex bun tix, nawh hu ka Elishie son sang pai jhawm saux tix moi heue. Elishie cau nawh hu com tix daux rawm Yawdan aliah bawg heue.




Yam jah Neman song rhawm ka Elishie, ang cu ti hu com tix heue. Viang mawh nan nawh loh rhawm tix mai hu com tix daux rawm Yawdan aliah bawg heue. Khaix hoik com nawh tix bawg ghoik, nawh yaox jhawm saux sipawg tix moi heue. Mawh Siyiex pa kieh jhawm saux Neman moi heue.



Cao jhai tang kaux kawx koe tom nie kaux heue. Kix sidiex gau ka pui khankix son ang sang krub ka rieng rao mai son sang im ju ka daux krax pa mawh pa meh cie Siyiex heue. Kix tawx satix grawng son sang doh keud pui ka phimap tix mai phan ang koe krax cu nghiiet, krax prawng ca Siyiex tag sang hoek ka piang kix mai Siyiex tag sang prawng ca ka kix heue.



Viang cao jhai khankix plak nie tawx satix miex ding kawx pui khankix ang nghiet kah heue. Kix nu nai ka cao jhai khankix heue. Bawg tiblah kix pah cao jhai yum heue. Cao jhai Yeramix yaox ti kham geu krax pa sau daux rawm maw pa ang koe rawm heue. Nawn glip daux glaox mai dex sang yum daux rawm maw. Viang mawh nan kheu krax chaox rhawm simiang, kix dee teei nawn lih sivoe sang yum nawn heue.



Viang kix yaox ti kham krax pa koeng pui kawx kix kawn ca krai grawng Siyiex heue. Cao jhai khankix tawx satix ka pui, phan ang doh keud ka phimap tix tag sang hoek krax laux leeing heue. Lheu khaing an, kix tawx satix grawng pa sang ploi Siyiex Misiyax hoek awm pa koe gumlox mukheu heue.

K. Deeh Theng Ka Been

1. Eliyax mai Ahap mawh pui pa yuh ka mawx ka daux been in?
2. Yam mox Eliyax tix khaing Ahap, Siyiex cox khre priex ih son nawh yuh ka mawx?
3. Kheu miex mai khre priex ih son Eliyax, Siyiex tawx buanson ka piang nawh yuh ka mawx?
4. Meung Isarilax yaox tix sipub ceu pa tix ka daux loe num?
5. Cao jhai Balax 450 kaux mai cao jhai Eliyax tiextu paox tix yuh ka mawx?
6. Siyiex jhi mhai rug pa yuh ka mawx grawng mawh Nawh Siyiex tete?
7. Cao jhai Elishie nhie Neman yuh pa tix son sang moi jhawm saux nawh?
8. Siyiex shiao ka cao jhai khankix ka daux pa yuh ka mawx?

Kh. Krax Pa Doh Rhawm Ka Been

1. Maix yaox yuh ka mawx ka grawng tiextu cao jhai Balax 450 kaux mai Eliyax?
2. Miex mai koe rhawm rhi pa yuh ka mawx?
3. Maix yaox yuh ka mawx ka grawng moi jhawm saux sipawg Neman? Kheu pa tix?
4. Baux ju dix Siyiex shiao cao jhai son sang sitoe Tix mai kawn pui. Baux ju in Siyiex sitoe Tix mai kawn pui yuh ka mawx?

G. Krax Pa Deeh Shiao Daux Ju Tix Khaing Been

1. Maix sang chix kieh pui tawng rhawm rhi Siyiex yuh ka mawx?
2. Maix sang chix teem ka pui pa iak riang khankix ka daux pa yuh ka mawx?

Ng. Ceu Pa Rieb Gau Ex Khaing Been In

1. Siyiex simie ti plak jhi grawng mawh Nawh Siyiex tete ka kawn pui, ka daux krax im ju ex.
2. Viang yaox ceu pa nu yuh ka mawx kawx, ex caw ti krai grawng Siyiex ka daux pa kaux cong krax yum rhawm tix heue.
3. Siyiex simie ti cie krax pa cu nghiiet mai pa hawt ti yuh heue.

P. Baux Lai Pa Caw Tix Ci

2Timose 2:9

*Mawh kheu lox sidiex an aux yaox ti kham geu pa nu,
tom phiawk aux awm pui caox. Viang mawh nan ang pon ti phiawk
ka gumlox Siyiex heue.*

Pa Grheu Hu Tang Meung


Mai Pa Deeh Hoek



Lai Simiang Phuk Ra 17:24–25, Lai Grawng Been Phuk Ra 36,
Lai Ezarax 1–10, Lai Nehamix 1–13




Meung Yudax mai meung Isarilax khawm ra meung yuh phimap sivoe ngai Siyiex. Kix ang nghiiet ka pingnyap pa hoik tawx Siyiex ka kix piang gawng Sina heue. Mawh kheu nan Siyiex tom shiao ka cao jhai khankix mai tawx satix ka pui ku bawg son sang doh keud ka phimap tix mai deeh krub ka Nawn Cao heue. Viang mawh nan pui in kix ang nghiiet kah heue.



Mawh kheu nan Siyiex tawx krax kha ka kix ka daux pa kieh meung ot kix laux leeing heue. Meung Isarilax laux leeing kheu pa lang teung vao mai kheu pa ting siawp sibrawm meung Ashurix heue. Pui Ashurix khankix pah ka pui Isarilax, tud rhim ka kraung pa koe ngawh jum mai gleeing dah dee ot kix ka ngu tom nie heue.



Pui Ashurix khankix kraix khrawm cao kaing, pui mi mai pui ting pingnya khankix khaing pui Isarilax mai viex kix hu daux meung Ashurix heue. Mawh ngie pui hot shia mai pui pa kawn deuk khaing krax yum khankix pa ot daux meung Isarilax heue.




Khaix an pui Ashurix kok ka pui tang meung khankix hoek ot daux meung Isarilax heue. Pui tang meung an kix deeh cox veng khankix mai teei ti koe nyiex ma mai pui Isarilax pa deuk khankix heue. Pui pa keh khaing kix tom kok mawh pui Samarix heue.


Viang pui Yudax yaox Siyiex tawx krax kha ka pui Isarilax kheu ang kix cu nghiiet mai ang yum rhawm kawx, kix kawn krub ka riieng rao mai siyiex meung Khanan heue. Siyiex tom ploi cao jhai son sang tawx satix ka kix heue. Viang mawh nan kix ang nghiiet ka lox cao jhai heue.




Khaix hoik yieh pui Ashurix meung Isarilax laux leeing daux been tix yieh num, Siyiex kieh simiang Babulon pa mawh Nebukhaneza hoek son sang puing ka meung Yudax heue. Meung Babulon mawh meung ting riang tix mu heue. Simiang Yudax kham ti ot greem pa kuang simiang Nebukhaneza mai tawx keun ku num heue.




Viang mawh nan ang rheung, pui Yudax tieh feen ka pui Babulon heue. Mawh kheu nan pui Babulon tom hoek puing ka kix heue. Pui Babulon teei veng Yerusalem, gleeing nyiex buan ka ngu mai viex kraung pa ngawh jum hu heue.




Kheu yuh kix krax pa tieh feen, kawn lien simiang Nebukhaneza pah ka kawn simex simiang Yudah khankix yum sivoe nawh mai kieh ngai nawh dug heue. Khaix an kix viex nawh hu daux thawng Babulon mai nawh yum tan heue.



Simiang Nebukhaneza mai pui naing nawh kok ka pui pa koe daux meung Yudax khankix khawm uik hu veng Babulon heue. Viang mawh nan prah grham ka pui sidaing hot shia son sang yuh kaung heue. In mawh krax pa tawx kieh kha kheu pa ghreu lih hu khaing meung heue.



Krax pa grheu lih khaing meung mawh pa ci yang Siyiex kheu phimap pa yuh kix heue. Viang mawh nan Siyiex kaux sijax ka piang kix heue. Siyiex priex riien ka kix, sikah mai kix ka daux cao jhai heue. Siyiex tawx sijax mukheu ka kix, son sang kieh kix deeh hoek ka meung pa hoik tiextu Nawh khaix hoik rheung 70 num heue.



Yam deeh hoek kix ka veng Yerusalem, kix deeh cox sum nyiex buan mai guh veng heue. Viang pui tang ceu kuang piang kix kawx kix deeh yaox ti ot meung pa tawx Siyiex sijax mukheu mai deeh pon ti rawg buan daux nyiex buan heue.

K. Deeh Theng Ka Been

1. Kheu pa tix Siyiex tawx krax kha ka meung Yudax mai meung Isarilax?
2. Pui Ashurix khankix huh pa tix ka meung Isarilax?
3. Pui ceu Samarix lih tix koe huh ka mawx?
4. Viang pui Yudax khankix yaox grawng laux meung Isarilax kawx, kix kawn im ju huh ka mawx?
5. Kheu pa tix pui Yudax khankix tieh feen ka pui Babulon?
6. Pui Babulon tuktiak tukte ka pui Yudax huh ka mawx?
7. Siyiex tawx lox sijax mukheu ka kix huh ka mawx?
8. Yam deeh hoek kix ka veng Yerusalem, kix huh pa tix?

Kh. Krax Pa Doh Rhawm Ka Been

1. Mawh kheu pa tix Siyiex kieh pui tang ceu hoek ti kuang mai tuktiak tukte ka pui ceu Isarilax mai Yudax?
2. Maix yaox jhawm kawn pui ka daux been in huh ka mawx?

G. Krax Pa Deeh Shiao Daux Ju Tix Khaing Been

1. Kheu pui Isarilax mai Yudax khankix ang nghiiet ka gumlox pingnyap Siyiex, kix yaox ti kham pa tuktiak tukte pui tang ceu. Maix chix priex lox tawm pingnyap Siyiex khankix huh ka mawx?
2. Viang pui Isarilax khankix thiang lox tom nie bawg kawx, Siyiex kawn koe krax pa chaox rhawm ka piang kix. Maix yaox huh ka mawx ka krax pa chaox rhawm Siyiex ka piang maix?

Ng. Ceu Pa Rieb Gau Ex Khaing Been In


1. Vaing Siyiex ci yang ka kawn pui kheu phimap pa yuh kix kawx,
Siyiex koe krax chaox rhawm mai priex jhak ka kawn pui heue.
2. Phan ex ang yaox krax pa kha rhawm, ang ex chix doh keud tix
yaogyaw ka buanson pa tawx Siyiex.

P. Baux Lai Pa Caw Tix Ci


1Kawrinthux 10:13

*Krax nyaw krax glaw ang lai hoek kah piang pex tix ceu
kawx pa ang kawn pui pon kham kah, viang mawh nan Siyiex
mawh pa kaux sijax, pa tag ang kieh pex yaox krax nyaw krax
glaw pa lheu khaing pa pon pex ti kham. Viang mawh nan tau mai
krax nyaw krax glaw tag sang kieh koe khawm krax dee chix luan
kah, son sang pon pex tix kham ka krax nyaw krax glaw heue.*


Siyiex Tawx Sijax Mukheu Grawng Sang Ploi Misiyax




Yam Jah 3:15,12:1–3, Sidiex 18:15, 2Samoelax 7, Yeramix 31,
Ezarax 59:16, Danyelax 7, Malakhix 4:5, Ezarax 7:14, Mikha 5:2,
Ezarax 9:1–7, 61:53, Yaogyaw 22:18, 35:19, 69:4, 41:9,
Zakharix 11:12–13, Ezarax 50:6, Yaogyaw 1610–11




Tom yam jah Siyex hoik khre riien ti sang tawx Misiyax lih hoek piang haktiex. Gumlox sijax mukheu pa ah Misiyax sang hoek, bleeh ka Adam mai Evax bawg liang heue. Siyex tawx sijax mukheu ah ti sang kieh doeh simie ceu cat Evax sang dig kaing si-uing khlaix. Si-uing pa nyaw glawng ka Evax mawh Satan heue. Dee bleeh sijax mukheu an sang ah ka grawng Misiyax tag sang hoek mai yuh Satan laux heue.




Siyex tawx sijax mukheu ka Abraham ah nin, “Kheu maix ceu cat pui khawm uik tag pon buanson heue.” Buanson an mawh Misiyax pa sang hoek, cao pa cox khre krax taoh son pui khawm uik heue.




Siyiex tawx sijax mukheu ka Mose ah sang ploi cao jhai pa awm nawh lih hoek heue. In kawx jhi grawng pa sang hoek Misiyax heue.




Siyiex tawx sijax mukheu ka Davit ah Misiyax tag sang lih hoek khaing daoh doeh nawh heue.



Siyex tawx sijax mukheu ka cao jhai Yeramix grawng sang deeh yuh nawh gumlox sijax mukheu pa khraox heue. Sijax mukheu pa khraox an mawh pa tiiem ti deuh daux sok rhawm kawn pui, son sang tawng kix ka Siyex mai son sang mawh kix pui cie Siyex heue. Siyex kawx sang pluat ploi phimap kix heue. Num riah pa jah sijax mukheu pa khraox an mawh Misiyax heue.



Misiyax an awm mawh Nawh cao jhai, mawh Cao giex kaing li mai mawh Simiang kawx heue. Cao jhai kienie mawh pui pa mhong ka lox Siyex mai deeh krai lox an ka kawn pui khankix heue. Misiyax mawh cao jhai pa grum naog tix kaux heue.




Cao giex kaing li mawh cao pa tan khu tang pui pa koe phimap khankix heue. Cao giex kaing li mawh cao pa rawg buan ka Siyiex tang kawn pui khankix heue. Misiyax mawh cao giex kaing li pa ting lhaong, pa tan ju Tix ka Siyiex son kawn pui khankix heue.




Simiang ah ex mawh cao pa koe sibrawm ka piang meung mai mawh cao pa kuang ka pui meung khankix heue. Misiyax pa sang hoek kienie mawh cao pa sang ngawm piang dang ngeung tax du Nawn Simiang Davit, cao pa sang kuang ka piang beu haktiex khawm uik, cao pa sang prawng ca daux pa rah see, cao pa tat been daux pa khaw caw mai Simiang pa grum naog heue.




Cao jhai mawh cao pa tawx lox grawng sang hoek Misiyax heue. Lheu khaing an cao jhai Malakhix ah cao jhai ting ti kaux sang hoek sivoe sang hoek Misiyax heue. Cao jhai Isayax krai grawng Misiyax tag sang hoek ti keh khaing bun krih pa singax. Cao jhai tang kaux kawx krai grawng Misiyax sang lih keh ka daux veng Bieliehiem heue.



Cao jhai khankix krai grawng kaing pa sang yuh Misiyax heue. Misiyax tag sang ot daux meung Galilie mai tag sang kieh pui pa bih rhawm khan kix nyawm rhawm, tag sang ploi ka pui pa ot ka daux pa phiawk laung luan mai tag sang tawx pui pa ot daux thawng khankix pon krax luat luan heue. Lheu khaing an Misiyax tag sang pai pui dug ngai, pui lheut yhaok, pui aw, pui grawn khankix moi heue.




Cao jhai Isayax dha ti krai grawng pa sang koeng pui mai pa sang thiang pui ka Misiyax heue. Daux lai Yaogyaw krai grawng sang yuh pui koeng nieb mai teei ka kraung ceep Nawn. Paox grawm Nawn tag sang thiang ti tik ka Nawn heue. Cao jhai Zakharix krai grawng paox grawm Nawn tix kaux tag sang coh Nawn ka mau 30 denari heue.




Cao jhai khankix krai grawng krax pa sang yum Misiyax kawx heue. Pui khankix tag sang baig ka Nawn, nu nai ka Nawn yuh pa ang ceu ang cak ka Nawn mai lah Nawn heue. Nawn tag kha rhawm Tix yum ka daux pa ang Tix koe phimap ka piang khaox lhak heue.



Misiyax mawh cao pa grum naog, pa ang koe phimap heue. Misiyax sang kham geu ti yum kheu phimap pa yuh kawn pui heue. Nawh mawh cao pa viex pa nhim, krax yiien yawg hoek son sang pon kawn pui mai Siyiex pa khaw caw ka paox tix heue.



Ang joeng mawh grawng kham Misiyax ti yum ngie, grawng sang kieh Siyiex Nawh deeh kaoh im khaing krax yum kawx cao jhai khankix hoik krai ti deuh heue. Kheu krax pa yum Nawh mai pa deeh kaoh im Nawh, mawh pa kieh grawng krax taoh grum naog, mai mawh num riah pa jah sijax mukheu pa khraox tix heue.



Siyiex jhi grawng pa dex dawd mai Misiyax ka cao jhai khankix tom nie heue. Viang mawh nan Misiyax ang nyang lih hoek heue. Khaix hoik rheung 400 num, yam hoek bawg yam, Siyiex tom ploi Misiyax lih hoek ka piang haktiex in heue.

K. Deeh Theng Ka Been

1. Tom yam jah Siyex hoek khre riien ti sang tawx Misiyax lih hoek piang haktiex yuh ka mawx?
2. Misiyax lih hoek khaing daoh doeh nyiex ma pui mawx?
3. Cao jhai Yeramix krai Misiyax mawh pui pa yuh ka mawx?
4. Cao jhai khankix krai grawng sang hoek Misiyax yuh ka mawx?
5. Misiyax sang yaox tix kham krax yum yuh ka mawx?
6. Ang joeng mawh grawng kham Misiyax ti yum ngie, ka grawng pa sang baox lih tix hoek khaix an kawx cao jhai khankix krai yuh ka mawx?

Kh. Krax Pa Doh Rhawm Ka Been

1. Misiyax tag sang hoek ti yuh Satan laux yuh ka mawx?
2. Sijax mukheu pa khraox mawh pa tix?
3. “Tag sang ploi ka pui pa ot ka daux pa phiauw laung luan mai tag sang tawx pui pa ot daux thawng khankix pon krax luat luan heue.” Iox in koe dee bleeh yuh ka mawx?

G. Krax Pa Deeh Shiao Daux Ju Tix Khaing Been

1. Son sang tawng pui grawng Misiyax, maix sang krai yuh ka mawx?
2. Ka daux been in, maix kawn pon riang rao pa yuh ka mawx?

Ng. Ceu Pa Rieb Gau Ex Khaing Been In

1. Tom yam bah ma la rawm, Siyiex hoik cox khre son sang ploi Misiyax lih hoek.
2. Misiyax mawh cao jhai pa krai lox Siyiex, Misiyax mawh cao giex kaing li pa ting lhaong pa tan ju Tix ka Siyiex mai Misiyax mawh Simiang Cao pa sang kuang leeing ju leeing phan ka daux pa rah pa see heue.

P. Baux Lai Pa Caw Tix Ci

Lai Isayax 4:3

Aux mawh Siyiex, Iheu khaing Aux, ang koe Cao Taoh.

